



Broj/ Број: 01/a-50-1-15-79/10
Sarajevo/Сарајево, 16.6.2010.

DOM NARODA
PARLAMENTARNE SKUPŠTINE
BOSNE I HERCEGOVINE

PREDMET: O b a v j e š t e n j e

Predstavnički dom Parlamentarne skupštine BiH je na 79. sjednici, održanoj 16.6.2010., razmatrao materijale koji su u nadležnosti i Doma naroda, o čemu vas obavještavamo, kako slijedi:

1. Prijedlog zakona o izmjenama i dopunama Zakona o radu u institucijama Bosne i Hercegovine, predlagač: Vijeće ministara BiH, zakon broj: 01,02-02-7-11/10, od 28.1.2010. (drugo čitanje);
2. Zahtjev Vijeća ministara BiH za razmatranje Prijedloga zakona o izmjenama i dopunama Zakona o graničnoj kontroli po hitnom postupku, u skladu s članom 127. Poslovnika, zakon broj: 01,02-02-6-40/10, od 4.6.2010. godine;
3. Prijedlog zakona o autorskim i srodnim pravima, predlagač: Vijeće ministara BiH, zakon broj: 01,02-02-2-5/10, od 18.1.2010. (drugo čitanje), odgođeno izjašnjavanje na 78. sjednici Doma;
4. Prijedlog zakona o kolektivnom ostvarivanju autorskih i srodnih prava, predlagač: Vijeće ministara BiH, zakon broj: 01,02-02-2-4/10, od 18.1.2010. (drugo čitanje), odgođeno izjašnjavanje na 78. sjednici Doma;
5. Prijedlog zakona o izmjenama i dopunama Zakona o zaštiti tajnih podataka, predlagač: Vijeće ministara BiH, zakon broj: 01,02-02-8-19/10, od 4.2.2010., sa Izvještajem Zajedničke komisije za nadzor nad radom Obavještajno-sigurnosne agencije BiH;
6. Prijedlog zakona o izmjenama i dopunama Zakona o polaganju pravosudnog ispita u Bosni i Hercegovini, predlagač: Vijeće ministara BiH, zakon broj: 01,02-02-5-28/10, od 14.4.2010. (drugo čitanje);
7. Izvještaj komisije Kolegija o nastojanju za postizanje saglasnosti o Prijedlogu zakona o promociji malih i srednjih preduzeća i preduzetništva u Bosni i Hercegovini, predlagač: Vijeće ministara, zakon broj 01,02-02-4-12/10, od 28.1.2010. (zakon u drugom čitanju);
8. Izvještaj komisije Kolegija o nastojanju za postizanje saglasnosti o Prijedlogu revidirane strategije Bosne i Hercegovine za provođenje Aneksa VII. Dejtonskog mirovnog sporazuma (drugo čitanje);
9. Prijedlog zakona o popisu stanovništva, domaćinstava i stanova u Bosni i Hercegovini 2011. godine, predlagač: Privremena komisija, zakon broj: 01-02-9-37/10, od 24.5.2010. (prvo čitanje);

10. Izvještaj o radu Upravnog odbora Izvozno-kreditne agencije Bosne i Hercegovine za 2009. godinu, materijal broj: 01,02-50-3-514/10, od 1.4.2010., odgođena rasprava na 78. sjednici;
11. Izvještaj o provođenju zakona u nadležnosti Centralne izborne komisije BiH za 2009. godinu, materijal broj: 01,02-50-3-578/10, od 19.4.2010.;
12. Informacija o stanju sigurnosti u Bosni i Hercegovini u 2009. godini, materijal broj: 01,02-04-635/10, od 30.4.2010.;
13. Informacija o utvrđivanju odgovornosti u Uredu za razmatranje žalbi BiH zbog neprovođenja odredbi pozitivnih propisa u vezi s redovnom procedurom rotacije na čelnoj poziciji Ureda s prijedlogom Vijeća ministara BiH da se Amir Pilav razriješi dužnosti člana Ureda za razmatranje žalbi BiH, materijal broj: 01,02-50-3-631/10, od 29.4.2010.;
14. Prijedlog za imenovanje članova iz Predstavničkog doma u Interresornu radnu grupu koja bi radila na izmjeni (akt Ministarstva pravde BiH):
 - a) Zakona o ministarstvima i drugim organima uprave BiH,
 - b) Zakona o Vijeću ministara BiH,
 - c) Zakona o državnoj službi u institucijama BiH,
 - d) Zakona o reviziji institucija BiH,
 - e) Zakona o upravi,
 - f) Zakona o javnim nabavkama BiH;
15. Davanje saglasnosti za otkazivanje:
 - a) Evropske konvencije o zaštiti arheološke baštine, usvojene u Londonu, 6. maja 1969.;
16. Davanje saglasnosti za ratifikaciju:
 - a) Sporazuma između Vijeća ministara BiH i Vlade Republike Francuske o saradnji u oblasti unutrašnje sigurnosti,
 - b) Sporazuma o zajmu između Bosne i Hercegovine i Evropske banke za obnovu i razvoj – *Projekat plinifikacije Srednjobosanskog kantona*,
 - c) Protokola o vodi i zdravlju uz Konvenciju o zaštiti i korištenju prekograničnih vodotoka i međunarodnih jezera iz 1992. godine,
 - d) Ugovora između Bosne i Hercegovine i Svete Stolice o dušebrižništvu katoličkih vjernika, pripadnika Oružanih snaga Bosne i Hercegovine.

Ad.1.

Nakon što je Kolegij kao komisija postigao saglasnost, Zakon o izmjenama i dopunama Zakona o radu u institucijama Bosne i Hercegovine **usvojen je** u drugom čitanju s amandmanima iz Izvještaja i Izmjene izvještaja Ustavopravne komisije koji glase:

Amandman I.

U članu 1. Prijedloga zakona o izmjenama i dopunama Zakona o radu u institucijama Bosne i Hercegovine stav 4. mijenja se i glasi:

„4. Zaključivanjem ugovora o radu između poslodavca i zaposlenika zasniva se radni odnos, u skladu s članom 12. ovog zakona.“

Amandman II.

U članu 2. stav 2. Prijedloga zakona o izmjenama i dopunama Zakona o radu u institucijama Bosne i Hercegovine briše se.

Amandman III.

Član 6. Prijedloga zakona o izmjenama i dopunama Zakona o radu u institucijama Bosne i Hercegovine briše se.

Dosadašnji čl. 7. do 27. postaju čl. 6. do 26. Prijedloga zakona o izmjenama i dopunama Zakona o radu u institucijama Bosne i Hercegovine.

Amandman IV.

U članu 7. koji je postao član 6. Prijedloga zakona o izmjenama i dopunama Zakona o radu u institucijama Bosne i Hercegovine stav 1. briše se, a u stavu 2. ispred riječi „Iza“ dodaju se riječi „U članu 19.“

Amandman V.

U članu 12. koji je postao član 11. Prijedloga zakona o izmjenama i dopunama Zakona o radu u institucijama Bosne i Hercegovine riječi: “je dužan“ zamjenjuju se riječju “može”.

Amandman VI.

U članu 14. koji je postao član 13. Prijedloga zakona o izmjenama i dopunama Zakona o radu u institucijama Bosne i Hercegovine u stavu 2. riječi: „može proglasiti” mijenjaju se riječju „proglašava“.

Amandman VII.

U članu 16. koji je postao član 15. Prijedloga zakona o izmjenama i dopunama Zakona o radu u institucijama Bosne i Hercegovine u stavu 4. tačka e) mijenja se i glasi:
„e) troškove dodatnog stručnog obrazovanja i usavršavanja za obavljanje radnih zadataka na odgovarajućem standardu,“.

Amandman VIII.

U članu 16. koji je postao član 15. Prijedloga zakona o izmjenama i dopunama Zakona o radu u institucijama Bosne i Hercegovine u stavu 4. u tački j) broj „30“ zamjenjuje se brojem „42“.

Amandman IX.

U članu 16. koji je postao član 15. Prijedloga zakona o izmjenama i dopunama Zakona o radu u institucijama BiH st. 2. i 5. brišu se.

Dosadašnji stav 3. postaje stav 2., a stav 4. postaje stav 3.

Amandman X.

U članu 17. koji je postao član 16. Prijedloga zakona o izmjenama i dopunama Zakona o radu u institucijama BiH u novom članu 53a. dodaje se novi stav 3. koji glasi:

„3. U slučaju da zaposlenik nije radio zbog opravdanog slučaja predviđenog zakonom ili aktom poslodavca, te zbog toga ne može biti ocijenjen u skladu sa stavom 1. ovog člana, u obzir će se uzeti rezultati rada zaposlenika koje je ostvario u periodu od šest mjeseci prije njegovog odlaska na opravdano odsustvo s posla. Odredbe ovog stava ne mogu se primijeniti na štetu zaposlenika koji je opravdano odsustvovao s posla.“

Dosadašnji st. 3. i 4. člana 53a. postaju st. 4. i 5.

Amandman XI.

Član 18. koji je postao član 17. Prijedloga zakona o izmjenama i dopunama Zakona o radu u institucijama Bosne i Hercegovine mijenja se i glasi: Član 54. mijenja se i glasi:

„Član 54.

1. S licem određenog stepena školske spreme, odnosno nivoa obrazovanja i zanimanja, koje prvi put zasniva radni odnos poslodavac može zaključiti ugovor o radu na određeno vrijeme u svojstvu pripravnika u skladu sa zakonom i kolektivnim ugovorom, podzakonskim aktom koji donosi Vijeće ministara za prijem pripravnika visoke školske spreme i planom poslodavca za ostale zaposlene.

2. Prava, obaveze i odgovornosti, koje se odnose na zaposlenog, propisane odredbama ovog zakona, odnose se i na pripravnika a utvrđuju se ugovorom o radu između poslodavca i pripravnika.“

Amandman XII.

U članu 18. koji je postao član 17. Prijedloga zakona o izmjenama i dopunama Zakona o radu u institucijama Bosne i Hercegovine u članu 54. dodaje se stav 3. koji glasi:

„3. Ugovor o radu s pripravnikom zaključuje se na određeno vrijeme, i to s pripravnikom visoke i više školske spreme na jednu godinu, a s pripravnikom srednje školske spreme na šest mjeseci.“

Amandman XIII.

U članu 21. koji je postao član 20. Prijedloga zakona o izmjenama i dopunama Zakona o radu u institucijama Bosne i Hercegovine, u stavu 2. koji propisuje izmjenu člana 61. stav 6. iza riječi „i stava 6.“ dodaju se riječi „ovog člana“.

Amandman XIV.

U članu 23. koji je postao član 22. Prijedloga zakona o izmjenama i dopunama Zakona o radu u institucijama Bosne i Hercegovine u stavu 1. u tački b) alineja 1. mijenja se i glasi:

"- suspenzija s radnog mjesta i obustava isplate plaće u periodu od najmanje dva do najviše 30 dana;"

Amandman XV.

U članu 23. koji je postao član 22. Prijedloga zakona o izmjenama i dopunama Zakona o radu u institucijama Bosne i Hercegovine u članu 62. u tački b) u alineji 2. broj „40%“ mijenja se brojem „30%“.

Amandman XVI.

U članu 25. stav 1. u tački e) riječ „ne“ briše se.

U članu 25. stav 1. u tački f) alineje 1. i 9. brišu se.

Amandman XVII.

U članu 25. koji je postao član 24. Prijedloga zakona o izmjenama i dopunama Zakona o radu u institucijama Bosne i Hercegovine, kojim se mijenja član 71. u stavu 1. u tački f) u alineji 2. riječi „ako zaposlenik ne poštuje radnu disciplinu predviđenu ovim zakonom i ugovorom o radu, odnosno ako je njegovo ponašanje takvo da ne može nastaviti rad kod poslodavca” i u alineji 3. riječi “ako zaposlenik dolazi na posao pod dejstvom alkohola ili opojnih droga, opija se u vrijeme rada ili koristi opojne droge;” brišu se.

Amandman XVIII.

U članu 25. koji je postao član 24. Prijedloga zakona o izmjenama i dopunama Zakona o radu u institucijama Bosne i Hercegovine u stavu 3. riječi: „Rješenje obavezno sadrži pravni osnov za davanje otkaza, obrazloženje i pouku o pravnom lijeku. Ovo rješenje je konačno. Zaposlenik koji nije zadovoljan rješenjem ima pravo pokrenuti radni spor pred nadležnim sudom za zaštitu svojih prava u roku od 15 dana od dana dostavljanja rješenja.” brišu se.

Amandman XIX.

Član 27. koji je postao član 26. Prijedloga zakona o izmjenama i dopunama Zakona o radu u institucijama Bosne i Hercegovine briše se.

Članovi 28., 29., 30. i 31. postaju čl. 26., 27., 28. i 29. Prijedloga zakona o izmjenama i dopunama Zakona o radu u institucijama Bosne i Hercegovine.

Amandman XX.

Član 31. koji je postao novi član 29. Prijedloga zakona o izmjenama i dopunama Zakona o radu u institucijama Bosne i Hercegovine briše se.

Dosadašnji čl. 32. i 33. postaju čl. 29. i 30. Prijedloga zakona o izmjenama i dopunama Zakona o radu u institucijama Bosne i Hercegovine.

Amandman XXI.

U članu 33. koji je postao član 30. Prijedloga zakona o izmjenama i dopunama Zakona o radu u institucijama Bosne i Hercegovine, u stavu 1., u novom članu 86a. u stavu 2. riječi: „suprotno osnovama iz člana 6. ovog zakona,” brišu se, a na kraju rečenice umjesto tačke stavlja se zarez i dodaju se riječi: „po nekoj od osnova iz člana 6. ovog zakona“.

U članu 33. koji je postao član 30. Prijedloga zakona o izmjenama i dopunama Zakona o radu u institucijama Bosne i Hercegovine u stavu 1. u novom članu 86d. u stavu 2. riječi: „dozvoljena diskriminacija zasnovana“ zamjenjuju se riječima: „dozvoljen nejednak tretman zasnovan“.

U članu 33. koji je postao član 30. Prijedloga zakona o izmjenama i dopunama Zakona o radu u institucijama Bosne i Hercegovine u stavu 1. u novom članu 86e. st. 3. i 4. mijenjaju se i glase:

„3. Seksualno uznemiravanje u smislu stava 1. ovog člana jeste svaki neželjeni oblik verbalnog, neverbalnog ili fizičkog ponašanja spolne prirode kojim se želi povrijediti dostojanstvo lica ili grupe lica, ili kojim se postiže takvo djelovanje, naročito kad to ponašanje stvara zastrašujuće, neprijateljsko, degradirajuće, ponižavajuće ili uvredljivo okruženje.

4. Nasilje na osnovu spola predstavlja bilo koje djelo kojim se nanosi ili može nanijeti fizička, psihička, seksualna ili ekonomska šteta ili patnja, kao i prijetnja takvim djelovanjem koja sputava lice ili grupu lica da uživa u svojim ljudskim pravima i slobodama i javnoj ili privatnoj sferi života.“

Amandman XXII.

Član 34. koji je postao član 32. Prijedloga zakona o izmjenama i dopunama Zakona o radu u institucijama Bosne i Hercegovine briše se.

Dosadašnji čl. 35., 36., 37., 38., 39., 40., 41., 42., 43., 44., 45., 46., i 47. postaju čl. 32., 33., 34., 35., 36., 37., 38., 39., 40., 41., 42., 43. i 44. Prijedloga zakona o izmjenama i dopunama Zakona o radu u institucijama Bosne i Hercegovine.

Amandman XXIII.

„U članu 45. koji je postao član 42. Prijedloga zakona o izmjenama i dopunama Zakona o radu u institucijama Bosne i Hercegovine, u novom članu 104. dodaje se novi stav 2. koji glasi:

„2. U slučaju da zakoni i drugi propisi entiteta i Brčko Distrikta na različit način reguliraju pitanje prava po osnovu porodijskog odsustva, Vijeće ministara Bosne i Hercegovine će svojom odlukom urediti ovo pitanje na jedinstven način, i to tako što će se primjenjivati rješenja onog nivoa vlasti u Bosni i Hercegovini koja su najpovoljnija za korisnice ovog prava. Sredstva potrebna za ovo osigurati će se u budžetu institucija Bosne i Hercegovine.“

Ad.2.

Predstavnički dom **usvojio je** Zakon o izmjenama i dopunama Zakona o graničnoj kontroli po hitnom postupku, u skladu s članom 127. Poslovnika.

Ad.3. i Ad.4.

Predstavnički dom **usvojio je prijedlog Ustavnopravne komisije** da se odgodi izjašnjavanje o Prijedlogu zakona o autorskim i srodnim pravima i Prijedlogu zakona o kolektivnom ostvarivanju autorskih i srodnih prava do naredne sjednice Predstavničkog doma.

Ad.5.

Predstavnički dom **nije prihvatio** Izvještaj Zajedničke komisije za nadzor nad radom Obavještajno-sigurnosne agencije BiH, pa se Prijedlog zakona vraća Zajedničkoj komisiji radi dostavljanja Domu novog izvještaja.

Ad.6.

Prijedlog zakona o izmjenama i dopunama Zakona o polaganju pravosudnog ispita u Bosni i Hercegovini **nije dobio potrebnu entitetsku većinu** pa slijedi usaglašavanje u Kolegiju kao komisiji.

Ad.7.

Nakon što Kolegij kao komisija nije postigao saglasnost, u drugom krugu glasanja, Predstavnički dom *odbio je* Prijedlog zakona o promociji malih i srednjih preduzeća i preduzetništva u Bosni i Hercegovini u drugom čitanju.

Ad.8.

Nakon što Kolegij kao komisija nije postigao saglasnost, u drugom krugu glasanja, Predstavnički dom *usvojio je* Revidiranu strategiju Bosne i Hercegovine za provođenje Aneksa VII. Dejtonskog mirovnog sporazuma u drugom čitanju.

Ad.9.

Predstavnički dom *usvojio je* Prijedlog zakona o popisu stanovništva, domaćinstava i stanova u Bosni i Hercegovini 2011. godine u prvom čitanju.

Ad.10.

Predstavnički dom *usvojio je* Izvještaj o radu Upravnog odbora Izvozno-kreditne agencije Bosne i Hercegovine za 2009. s Mišljenjem Komisije za vanjsku trgovinu i carine.

Ad.11.

Predstavnički dom *usvojio je* Izvještaj o provođenju zakona u nadležnosti Centralne izborne komisije BiH za 2009. godinu.

Ad.12.

Predstavnički dom *primio je k znanju* Informaciju o stanju sigurnosti u Bosni i Hercegovini u 2009. godini i *usvojio Zaključak* iz Mišljenja Zajedničke komisije za odbranu i sigurnost BiH koji glasi:

Zadužuje se Vijeće ministara BiH da, s ciljem poboljšanja postojećih zakonskih rješenja, što prije uputi u parlamentarnu proceduru prijedloge zakona navedene u dijelu Informacije koji se odnosi na mjere i radnje u prvih šest mjeseci 2010., a to se prije svega odnosi na: Prijedlog zakona o izmjenama i dopunama Zakona o krivičnom postupku, Prijedlog zakona o izmjenama i dopunama Zakona o sprečavanju i suzbijanju zloupotrebe opojnih droga, Prijedlog zakona o izmjenama i dopunama Zakona o graničnoj kontroli, te Prijedlog zakona o izmjenama i dopunama Zakona o Državnoj agenciji za istrage i zaštitu.

U toku rasprave predloženi su sljedeći zaključci:

- 1. Zaduguje se Vijeće ministara BiH da o svim oblastima obuhvaćenim Informacijom o stanju sigurnosti u BiH, u kojima je došlo do pogoršanja stanja u odnosu na raniji period, izradi posebnu informaciju. Posebnom informacijom potrebno je detaljno ukazati na razloge pogoršanja, kao i na prijedlog mjera s ciljem poboljšanja stanja.**
- 2. Predstavnički dom zaključuje da će u dnevni red 80. sjednice uvrstiti tačku koja se odnosi na Informaciju o izvedenoj akciji „Svjetlost“ u Maoči (2.2.2010.)**

3. **Predstavnički dom zaključuje da će, u slučaju da nadležno ministarstvo ne dostavi informaciju, na 80. sjednici pokrenuti pitanje odgovornosti ministra sigurnosti BiH.**

Predstavnički dom *usvojio je* zaključke broj 1. i 2. dok zaključak broj 3. *nije dobio potrebnu entitetsku većinu* pa slijedi usaglašavanje u Kolegiju kao komisiji.

Ad.13.

Predstavnički dom *nije primio k znanju* Informaciju o utvrđivanju odgovornosti u Uredu za razmatranje žalbi BiH zbog neprovođenja odredbi pozitivnih propisa u vezi s redovnom procedurom rotacije na čelnoj poziciji Ureda, *te je odbio* prijedlog Vijeća ministara BiH da se Amir Pilav razriješi dužnosti člana Ureda za razmatranje žalbi BiH.

U toku rasprave predloženi su zaključci koji glase:

1. **Od Vijeća ministara BiH tražimo informaciju o odgovornosti u vezi s neimenovanjem članova Ureda za razmatranje žalbi u periodu 25.9.2006. - 26.3.2009. za koje vrijeme je dr. Amir Pilav bio imenovan za privremenog predsjedavajućeg Ureda za razmatranje žalbi.**
2. **Od Vijeća ministara BiH tražimo informaciju o spornim odredbama Pravilnika kojima se regulira da „Vijeće ministara BiH može razriješiti predsjedavajućeg Ureda za razmatranje žalbi na pismeni zahtjev poslanika u PSBiH, člana Vijeća ministara BiH ili člana Ureda za razmatranje žalbi.“ (čl. 5. st. (1) i (2) Pravilnika)**
3. **PSBiH „izražava nezadovoljstvo zbog neprofesionalnog i krajnje neodgovornog i tendencioznog odnosa“ prema predsjedavajućem Ureda za razmatranje žalbi u postupku donošenja i primjene Pravilnika o unutrašnjoj organizaciji Ureda za razmatranje žalbi.**

Navedeni zaključci *nisu dobili potrebnu entitetsku većinu* pa slijedi usaglašavanje u Kolegiju kao komisiji.

Ad.14.

Predstavnički dom *imenovao je članove* iz Predstavničkog doma u Interresornu radnu grupu, kako slijedi:

- a) za Zakon o ministarstvima i drugim organima uprave BiH i Zakon o Vijeću ministara BiH Velimira Jukića,
- b) za Zakon o državnoj službi u institucijama BiH i Zakon o upravi Željka Kuzmanovića,
- c) za Zakon o reviziji institucija BiH i Zakon o javnim nabavkama BiH Sadika Bahtića.

Ad.15.

Predstavnički dom *dao je saglasnost* za otkazivanje Evropske konvencije o zaštiti arheološke baštine, usvojene u Londonu, 6. 5. 1969.

Ad.16.

Predstavnički dom *dao je saglasnost* za ratifikaciju:

- a) Sporazuma između Vijeća ministara BiH i Vlade Republike Francuske o saradnji u oblasti unutrašnje sigurnosti,
- b) Sporazuma o zajmu između Bosne i Hercegovine i Evropske banke za obnovu i razvoj – *Projekat plinifikacije Srednjobosanskog kantona*,
- c) Protokola o vodi i zdravlju uz Konvenciju o zaštiti i korištenju prekograničnih vodotoka i međunarodnih jezera iz 1992. godine,
- d) Ugovora između Bosne i Hercegovine i Svete Stolice o dušebrižništvu katoličkih vjernika, pripadnika Oružanih snaga Bosne i Hercegovine.

PREDSJEDAVAJUĆI
PREDSTAVNIČKOG DOMA
Niko Lozančić